

Allannguutissatut siunnersuut

uunga

Uunga siunnersuut: Eqqissimatisarneq aamma allatigut kulturikkut eriagisassanik kulturikkut kingornussatut illersuineq pillugu Inatsisartut inatsisaannik allanngortitsineq pillugu Inatsisartut inatsisaat

Naalakkersuisunit pingajussaaneerneqarnissaanut saqqummiussaq.

§ 1-imut

1. Nr. 2-p kingorna § 1-imu ikkunneqassaaq normutut nutaatut:

”**01. § 6, imm. 2, imatut oqaasertalerneqassaaq:**

“ *Imm. 2. Qanganitsanit nunamit peerneqarsinnaanngitsunit 2 meterinit qaninnerusumiittumi ingerlatsisoqaqqusaanngilaq. Tamatumali akornusinngilaa tamat inussulianut aamma inussulianiittunut nalunaarsuutinut ornigussinnaaneri, tamanna qajassuussisumik aamma sissuertumik pippat.”*

2. § 1, nr. 3-mi, § 6, imm. 4 imatut oqaasertalerneqassaaq:

“ *Imm. 4. Nunami allanngutsaaliukkami Kalaallit Nunaata Avannaani aamma Kangiani ingerlatsisoqarsinnaanngilaq sunilluunniit qanganitsat nunamiit peerneqarsinnaanngitsunit 100 meterinit qaninnerusumiittumi. Tamatumali akornusinngilaa tamat inussulianut aamma inussulianiittuni oqaluttuanut ornigussinnaaneri, tamanna qajassuussisumik aamma sissuertumik pippat.”*

Siunnersummut oqaaseqaatit

Nalinginnaasumik oqaaseqaatit

Allannguutissatut siunnersuut saqqummiunneqarpoq Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap siunnersuutip aappassaaneerneqarnissaanut atatillugu isumaliutissiissummini Naalakkersuisut kaammattornikuummagit, siunnersuutip pingajussaaneerneqarnissaa sioqqullugu allannguutissamik siunnersuuteqaqqullugit, siunnersummit Naalakkersuisut ersersitsisimancerannut naapertuuttunngortitsisoqarnissaanik, ajornartinneqassanngitsoq inussuit atorneqartarsinnaaneri, inussunniittut oqaluttuat atuarneqartarnissaanni, tamanna qajassuussisumik aamma sissuertumik pigaangat.

Siunnersuutikkullu taamaasilluni erseqqissarniarneqarpoq inatsisini aalajangersagaasunik qaninnerpaaffissaligaasunik illersuinernik aaqqissuussinerit akornusinngikkaat tamat inussulianut aamma inussulianiittunut nalunaarsuutinut ornigussinnaaneri, tamanna qajassuussisumik sissuertumillu pigaangat. Tamanna isiginiarneqassaaq Eqqissimatisarneq aamma allatigut kulturikkut eriagisassanik kulturikkut kingornussatut illersuineq pillugu Inatsisartut Inatsisaanni § 6, imm. 1-imut atasutut, tassani aalajangersarneqarmat eqqissimatisinerup kingunerigaa eqqissimatinneqartut ajoquserneqassanngitsut imaluunniit tamakkiisumik ilaannakortumilluunniit nuunneqassanngitsut.

Inussuit aamma inussunniittut nalunaarsuutit oqaluttuallu annertuumik nassaassaammata Nunami Eqqissisimatitaasumi Kalaallit Nunaata avannaani aamma Kangiani, kisiannili aamma nassaassaasarlutik Kalaallit Nunaanni sumiiffinni allani. Ornigussinnaanermut tunngatillugu aqutsisoqarnissaanut apeqqummi inussuit aamma inussunniittut nalunaarsuutit oqaluttuallu nalunaarsukkat tamarmik pineqarmata, apeqqutaattinnagu nunatta sua tungaani inissisimaneri, allannguutissatut siunnersuutikkut taamaattumik siunnersuutigineqarput allannguutit § 6, imm. 4-mut nutaamut atatillugu, nunamut allanngutsaaliugaasumut atatillugu, aammalu ataatsimut isigisumik § 6, imm. 1-imi malittarisassamut atatillugu.

Aallaaviutillugu (suliniutinik) ingerlatsisoqarsinnaanngitsoq, ilaatigut tunngaviuvoq pinngitsoorumeqarmat inuit tamat akornanni mianersuaalliorlutik qanganitsanik eqqissisimatitaasunik ajoqusiisoqarsinnaanera. Inussunnuli tunngatillugu pissutsit imaapput, inussuit taakkunaniittullu oqaluttuaatit, qanoq ittuunerit tunngaviullutik inuit tamat susassarisussaagaat, sukannersumillu inerteqquteqarneq inussuit inussunniittullu nalunaarsuutit oqaluttuallu tikeequsaannginneri siunertaanngitsumik kissaatigineqanngitsumillu inussuit oqaluttuaataasalu atorneqarnissaannik siunnerfeqarnermik kissaatigineqanngitsumik killiliissammatt.

Siunnersummi aalajangersakkanut ataasiakkaanut oqaaseqaatit

Nr. 1-imut

“Qajassuussisumik aamma sissuertumik periaaseqarnikkut” paasineqassaaq inuit tamat sumiiffimmiissinnaanerat atuisinnaanerallu inussunnik aamma oqaluttuanik inussunniittunik mianersortumik pisassasoq, inussunnut qanillatornermi, inussunniittunillu nalunaarsuutinik oqaluttuanillu atuarnermi, aammalu oqaluttuanik nalunaarsukkanik inisseeqqittarneq pisassasoq aseruinani. Tamatumalu aallaavigivaa qajassuussinissaq aseruinnginnissarlu.

Nr. 2-mut

Qanoq “qajassuussisumik aamma sissuertumik” paasineqassanersoq pillugu innersuunneqassapput nr. 1-imi allassimasut.